



FYLKESMANNEN I SOGN OG FJORDANE

Sakshandsamar, tlf
Turid Måseide – 57 65 55 16
E-post: tbm@fmsf.no

Vår dato
30.11.2007
Dykkar dato

Vår referanse
2007/4623 - 732.0
Dykkar referanse

Helse- og omsorgsdepartementet
Postboks 8011 Dep,
0030 Oslo

Høyringsuttale til utkast til endring i forskrift om kommunen sitt helsefremjande og førebyggjande arbeid i helsestasjons- og skulehelsetenesta

Fylkesmannen i Sogn og Fjordane meiner vi treng reglar som sikrar at barnet får hjelp til å ta medisinar sine på føreskriven måte i barnehage, skule og SFO. Både foreldra, helsetenesta og barnehage/skule/SFO har behov for eit regelverk som tydeleg plasserer ansvar og stiller krav om fagleg tilfredsstillande system og utføring.

Gjeldande rett på området er uoversiktleg, og det er uklart kva rett barnet har og kva plikter foreldre/helsepersonell/helsetenesta/barnehage/skule/SFO har og kor langt desse pliktene går. Reglane er derfor til lite hjelp der det er vanskeleg å få til ei god ordning.

Framlegget til forskriftsendring går ut på at helsestasjon og skulehelsetenesta skal medverke til at det vert etablert rutinar for legemiddelhandtering i barnehagar, skule og SFO. Slik vi forstår departementet er det her tenkt generelle, overordna rutinar. Dette vil etter vårt syn ikkje vere tilstrekkeleg til å sikre at det enkelte barnet får nødvendig hjelp med medisinar sine.

I departementet sin gjennomgang av gjeldande rett går det fram at dersom medisiner vil vere forsvarleg utan assistanse frå helsepersonell, vil barnet ikkje ha rett til nødvendig helsehjelp i form av legemiddelhandtering. I slike tilfelle vil ansvaret for å ivareta legemiddelhandteringa liggje på foreldra i kraft av foreldreansvaret. Det er då ein føresetnad at behandlande lege gjev foreldra den informasjonen og den opplæringa dei treng for å kunne handtere legemidla på forsvarleg måte.

Problemet oppstår når barnet er i barnehage, skule eller SFO og det ikkje er praktisk mogleg for foreldra å gje barnet den hjelpa barnet treng.

- Kven er då ansvarleg for at barnet får hjelp? Og korleis skal foreldre gå fram for å sikre at barnet deira får nødvendig hjelp?
- Kven er ansvarlege for at det er eit system for observasjonar, vurderingar, medikamentutdeling, dokumentasjon og kommunikasjon på plass den dagen barnet begynner i barnehage/skule/SFO? Kva rolle har foreldre/helsetenesta/barnehagestyrar/ rektor/eventuelt andre i dette?
- Kven er ansvarlege for informasjon og opplæring om legemiddelhandteringa til dei som skal ivareta dette i barnehage/skule/SFO?
- Kven skal kvalitetssikre at systemet rundt barnet fungerer?
- Og kva verkemiddel har barnet/foreldra om legemiddelhandteringa ikkje vert ivareteke på ein tilfredsstillande måte i barnehage/skule/SFO?

Vi meiner det er behov for reglar som klargjer kven som er ansvarleg for kva når det gjeld legemiddelhandteringa til barn i barnehage/skule/SFO. Reglane må sikre at foreldre til kronisk sjuke barn får hjelp med å få på plass avtalar og rutinar rundt barnet sitt før det begynner i


Hovudkontor
Njøsavegen 2, 6863 Leikanger
Telefon: 57 65 50 00
Telefaks: 57 65 50 55
Org.nr 974 763 907


Landbruksavdelinga
Fjellvegen 11, 6800 Førde
Postboks 14, 6801 Førde
Telefon: 57 65 50 00
Telefaks: 57 72 32 50

E-post:
post@fmsf.no
Internett:
www.fylkesmannen.no/sfj

barnehage/skule/SFO, og at foreldre/behandlende lege kan følge med på om oppgåva vert ivareteken på ein tilfredsstillande måte. Dersom barnehage/skule/SFO ikkje ivaretek legemiddelhandteringa på tilfredsstillande måte, må barnet ha rett til nødvendig helsehjelp i form av legemiddelhandtering frå kommunehelsetenesta den tida det er i barnehage/skule/SFO. Behandlende lege må vere ansvarleg for informasjon og opplæring om legemiddelhandteringa til dei som skal utføre oppgåva.

Med helsing


Petter Øgar
fylkeslege


Turid Maseide
rådgjevar